

佛说一切法功德 庄严王经

唐三藏法师义净译



南無本師釋迦牟尼佛


说明

根据《乾隆大藏经》大乘单译经部，第 0494 部，唐三藏法师义净译《佛说一切法功德庄严王经》原藏影印本校对。句读仅供参考。

本电子书是免费结缘品，特此说明。

仁慧草堂

二〇二一年三月



扫码关注仁慧草堂微信公众号

● 起诵仪

诵经警文

香赞

炉香乍爇，法界蒙薰，诸佛海会悉遥闻，随处结祥云，诚意方殷，诸佛现全身。

南無香云盖菩萨摩訶萨

南無本师释迦牟尼佛

开经偈

无上甚深微妙法 百千万劫难遭遇
我今见闻得受持 愿解如来真实义

佛说一切法功德庄严王经¹

唐三藏法师义净译²

如是我闻：

一时，薄伽梵在王舍城羯兰钵迦池竹林园中，与大苾刍众五百人俱。菩萨摩訶萨千二百人，皆得陀罗尼，辩才无滞，获无染智，游无碍境，善权方便摄引众生，观察世间心行平等，饶益慈悲意乐纯净，于诸佛所甚深妙法悉能咨问。其名曰：慈氏菩萨摩訶萨、常勤勇菩萨摩訶萨、平等住菩萨摩訶萨、大慧菩萨摩訶萨、无边辩菩萨摩訶萨、勇慧菩萨摩訶萨、观自在菩萨摩訶萨、除疑菩萨摩訶萨，如是等诸大菩萨摩訶萨而为上首。并诸释、梵、护世四天王、龙神八部及诸外道，数有六千，各将眷属悉皆云集。此等大众咸至佛所，礼佛足已，右绕三匝，雨妙天华、奏天音乐、烧众名香而为供养。尔时，大众咸作是语：“善哉！善哉！如来教法具大威德，有归信者能断烦恼。”作是语已，各坐一面。

1

2

尔时，世尊入能断惑离垢三摩地。入此定时，大地即便六种震动；雨天细末微妙栴檀及妙天华，在处弥布；放大光明，周遍世界。若诸有情堕恶趣者，蒙光得脱。亦至一切天、龙、药叉八部之众所居宫殿，无不明照、闻天音乐及天妙香。彼诸天神见不思議希有事已，皆生是念：“谁作如是殊胜神力，令地大动，雨天香华，放大光明，照耀宫室？”作是念已，互相告曰：“此是如来现大威德，非余天等能有斯瑞。我等今者应往竹园，诣世尊所，礼拜供养，听闻妙法。”彼各持天嘼钵罗华、拘物头华、分陀利华、苏健提华、曼陀罗华、摩诃曼陀罗华至世尊所，顶礼双足，而为供养；雨众天华，弥满大地，积至于膝；瞻仰尊颜，合掌恭敬。复有他方无量菩萨及执金刚菩萨、庄严王菩萨，并万亿诸天、持咒神王，见大光明，各以威力作妙庄严香华、音乐来至佛所，并诸眷属，皆绕三匝，虔诚合掌，礼佛双足，为供养已，皆具威仪，退坐一面。

尔时，慈氏等诸大菩萨见诸大众皆云集已，作如是念：“我观大众咸至佛所，必当演说不可思議殊妙之法。”咸皆寂虑，伫听微言。

是时，世尊知诸菩萨、一切大众心之所念，

即从定起，告庄严王菩萨言：“善男子，汝今宜去观此大地，何所见耶？”

时，庄严王菩萨承佛教已，从座而起，即观大地。既遍观已，还至佛所，礼佛双足，在一面立，白佛言：“世尊！我承³佛教观此大地，所有人、天、一切大众并⁴皆云集，惟愿慈悲为诸众生作饶益事。”

尔时，佛告庄严王菩萨言：“汝当一心听我所说，我今当与六十四亿有缘众生，授无上菩提记。”

尔时，执金刚菩萨即从座起。合掌向佛，白言：“世尊！今有无量亿数天、龙、药叉及诸罗刹、乾闥婆、阿修⁵罗、揭噜荼、紧那罗、莫呼洛伽、人及非人并诸外道，悉皆来集。世尊！今正是时，惟愿为说一切法功德庄严王经，能消一切业障，能灭一切罪苦，能断一切魔业，未信有情令生敬信，除去饥馑常得丰乐，消诸疾病远离枉死，亦令有情永除追悔，悉得安隐常受快乐。世尊！我往昔时，曾于电光佛所听受此经，才得闻已，一切妙法皆得现前，一切恶道悉皆关闭，

3

4

5

所有业障咸得消除。惟愿慈悲为众演说！”作是语已，世尊默然。

尔时，执金刚菩萨亦复如是，再三殷勤劝请为说。佛告执金刚菩萨言：“善男子，汝勿请我说一切法功德庄严王经。何以故？我若说者，于后恶世，当有众生不能信受，作如是语：‘此经非是如来所说，亦非赞毁此经能招善恶二⁶种之业！’然彼众生为悭贪故，不能恭敬供养是经，于说法师亦不亲近，谤毁是经广兴不信，于现世中造众恶业，未来之世堕地狱中，受烧然苦。善男子，如此经王，深可尊重犹如父母，复能灭除诸恶业障。然于五浊恶世，非是说时，亦非听时。何以故？勿当令彼一切外道及诸有情堕于地狱、饿鬼、傍生长受诸苦。然此众生信心缺少，乐著诸欲，勤营俗务，贩卖诤讼，于此经典必起谤心。此等众生命终之后，堕八大地狱当受极苦。”

尔时，众中有八万人，俱从座起，顶礼佛足，白佛言：“世尊！我等深心信是经典，尊重供养，书写读诵，广为他说。若有愚人不信此法，由慢法故，亦当毁骂轻陵于我，我于尔时悉皆忍受，报此经恩，终无恨忿。惟愿为说殊胜经典，所以

者何？此妙经王于当来世，利益众生如佛无异。”
作是语已，退坐一面。

执金刚菩萨白佛言：“世尊！云何菩萨摩诃萨求善知识？”

佛言：“善男子，求善知识应当如是成就四法：一者，数往请问；二者，起精勤心；三者，意乐清净；四者，尊重爱法。”

执金刚菩萨白佛言：“世尊！云何菩萨住阿兰若？”

佛言：“善男子，成就四法住阿兰若：一者，舍离俗家；二者，远恶知识；三者，尽舍财物；四者，常摄自心。”

尔时，观自在菩萨白佛言：“世尊！我不见有闻此经人堕恶趣者。世尊！此经有大威德，难可思量。世尊！若有暂闻此经，礼拜赞叹，供养恭敬，获无量福，何况书写、读诵、受持，种种香华而为供养，及说法师以衣食等而为供养？如是之人，一切诸佛共所护念，为其授记，当得往生安乐世界。如是法师，与佛无异。”

佛言：“善哉！善哉！善男子，我亦供养如是法师，亦为授记，当得生于安乐世界，速趣菩提。若复有人，于诸佛所及此经典尊重恭敬已，

妙香华、涂香、末香、衣服、璎珞、种种音乐、幢盖、缯幡而供养者，此人终无非时横死，无有怨贼兵战之怖，亦无父母、妻子、眷属、朋友、知识忧戚之苦，有所希求无不遂意。善男子，诸佛出世，其事甚难，得闻是经，更难于彼！若斯经典所在之处，城邑聚落、兰若林中及余住处，当知此地，即是诸佛世尊之所摄受。”

尔时，执金刚菩萨白佛言：“世尊！观自在菩萨者，以何因缘名观自在？”

世尊告曰：“常以净眼观察世间所有众生，慰喻成熟，慈悲利益，便得安隐。若称名者，有所愿求，咸令满足，以是因缘名观自在。”

复白佛言：“若有众生，但称观自在菩萨名者，尚得满足所求之事，何况有人供养如来及此经典，书写读诵，广为他说，衣服香华而为供养？此人得福无量无边！”

观自在菩萨白佛言：“世尊！此经大有威德，能作佛事。惟愿世尊，更为哀愍诸众生故，为说陀罗尼咒。”

佛言：“善男子，有陀罗尼，名曰胜妙。我昔为菩萨时，于胜妙世界妙音佛所，与诸大众共闻此陀罗尼咒，既受得已，证十地法，无量众生

悉皆获得无生法忍。”

尔时，会中诸菩萨众皆从座起，白佛言：“世尊！惟愿慈哀怜愍我等，说此陀罗尼咒。”

尔时，世尊以梵音声，即说咒曰：

“怛侄他。逝也逝也。逝耶。缚诃⁷ 佉缚诃。
逝也缚诃。忽鲁忽鲁。钵头摩 薛阿婆。麽梵谜。
萨啰。萨唎泥⁸ 地哩地哩。地啰地哩。提婆颯。钵
利。波唎⁹泥¹⁰ 瑜陀。唵多唎¹¹你。钵啰。斫羯啰。
你婆唎¹²。你脯唎¹³也。婆伽梵。我名某甲。由佛
加护。一切所求。咸愿圆满。一切罪业。皆悉消
除。莎诃。”

佛言：“善男子，此胜妙陀罗尼咒能除一切罪障，能摧伏他军，永无饥馑、疾疫、灾难、病苦之事，常能丰饶、仓廩盈实¹⁴、增益寿命。此陀罗尼咒是诸佛母。若有善男子、善女人，信心顶礼、恭敬供养、书写、读诵、受持此经，亦复供养持经法师，此人业障皆得消灭，不遭横死，于现身中常受欢乐，父母、妻子、朋友、眷属悉

7

8

9

10

11

12

13

14

嚩
嚩
嚩

皆安隐，所有愿求无不遂意。”

执金刚菩萨复白佛言：“世尊！我亦敬心持是经典。若复有人以妙香华并诸饮食供养此经及法师者，我亦随喜，同¹⁵心供养此经。在其国土，王及诸人我皆拥护，令离衰恼，所求遂愿。世尊！我今发起勇猛之心，为彼国王及信受者，亦为宣说陀罗尼咒而为拥护。”

佛言：“善男子，汝能为诸众生利益安乐说陀罗尼，我当随喜。”

尔时，执金刚菩萨以佛神力所加持故，说此陀罗尼咒：

“南麼萨婆勃陀。怛他揭多喃¹⁵。南麼阿弥多婆也。怛他揭多也。南麼萨婆。菩提萨埵喃¹⁶。南麼萨婆莫嚩地鸡弊¹⁷。怛侄他。虎呼谜。虎呼谜末底。莫诃末底。跋折罗¹⁸末底。侄栗茶。跋折罗¹⁹末底。怛他揭多。阿奴钵哩。婆利帝。萨啰萨啰。阿瑜目企。苾哩俱掇。毗俱多目企。訖栗闭。訖栗波鹿计。萨帝²⁰阿奴。飒末啰。薄伽梵。跋

15

16

17

18

19

20

折啰波你。萨婆波跋。羯麼贲²¹也。我某甲 所有愿求。皆得遂意。当与我愿。以佛陀实语。达摩实语。菩萨实语。声闻实语。莎诃。

“世尊！若复有人，欲入菩萨地、愿见诸如来、乐生净土及希富贵、财宝丰盈、无病延寿者，应当于²²此微妙经典及以法师，书写读诵，香华、妓乐、衣服、饮食、缯盖、幢幡而为供养。如是之人，我当拥护，所求愿满，常²³起爱念犹如一子。世尊！若复有人，禀性痴钝欲求聪明，及护国土令无²⁴疾疫者，当于白月八日起首，一日断食念诵此咒，至十五日乃至月尽。于中惟食三种白食，谓白饭²⁵、乳、酪，清净澡浴，诵此神咒满十万遍。若有力者，满三十万遍，常可随力供养三宝。次令画师受八戒斋，身衣净洁而画其像。于其铺中，安释迦佛像，处师子座，作说法仪。右边安观自在菩萨，以诸严具而庄饰之，于莲华上立身有四臂，右边上手执梵本经，下手执数珠，左边上手执白莲华，下手把君持。左边安执金刚神，右手执金刚杵，左手遥承杵头，颜貌和悦，

21

22

23

24

25

瓔珞严身。于其四边安护世四天王。此等尊像皆以缯带，盛佛舍利挟在身中。次于像前，可作一坛，随时大小，四面开门，以牛粪涂拭，种种香华散布其上。香炉五具，别然五香，所谓沉、檀、苏合、安悉²⁶、熏陆。于坛四门，各安两瓶，或盛清水，或复盛乳。灯盏十六，随处安置。悬缯幡盖及众音乐，香水洒地，香华饮食而为供养。于坛四角，令人读诵此经，各各澡浴，著鲜净衣，食三白食。其所为人，置华手中，令彼合掌说所求事，起慈念心，随情发愿，以华散佛，有所愿者皆得从心。于七日中，我当为现殊胜相状，令见好梦，共其言语，满彼求心，除不信者。”

佛言：“善哉！善哉！汝能愍诸有情说此咒法。”

尔时，观自在菩萨告执金刚菩萨言：“此妙经典难可值遇，薄福众生于其国内，虽有此经不能得见，亦复不能书写、读诵、听闻、受持。何以故？由有恶魔为障碍故。复次，善男子，若有众生书写、读诵此经典时，有四恶魔而为恼乱。云何为四？一者，情生懈怠；二者，起不信心；三者，于法师处不生尊重；四者，心不能定，此

人即应知是魔事。复有四种恶魔之业。云何为四？一者，远离善知识；二者，不如理作意；三者，不解文字；四者，惟见现在，言无未来；造诸恶业，心无怖惧，说无因果；我说者是，余皆非法；乐营俗务，贪染所缠。如是众生当堕地狱，经无数劫受大苦恼。复次，有四种魔。云何为四？一者，贪著财物；二者，亲近恶友；三者，障碍法师；四者，于法师说陈其罪过。是等众生由此业故当受贫穷，不见善友远离尊师，作邪见想说无因果，堕于地狱受诸剧苦。”

佛告大众：“我今再三实言告汝，勿为放逸轻此经典，一心信受莫生诽谤。”

尔时，世尊欲重宣此义，而说颂言：

我曾宣说众经王	令诸众生得正觉
今更说斯真妙典	汝闻恭敬善修行
勿受当来极苦痛	堕在地狱经多劫
能于此经生信心	世世常为我真子
又复供养此经者	当得生于净土中
现无罗刹鬼神欺	亦无众恶来侵扰
若此经王所住处	无诸灾厄能害人
所有求愿悉随心	安乐能至菩提岸

尔时，四天王闻此颂已，悲泣流泪，举身颤

²⁷掉，礼佛双足，白言：“世尊！我等四天王若见守持此经法师，我当供养。彼说法时及诸听众，皆当覆护。若有国王于此经典，书写读诵、受持供养者，我当拥卫及彼国人犹²⁸如一子，亦以衣服、璎珞而供给之，令彼国界丰饶、财宝无所缺乏，若战阵时，常令得胜。念报佛恩，我无懈怠。世尊！若复有人闻此经典，不生信心供养法师者，我于是人无有方便能为救脱，但生忧恼。”

佛言：“善哉！善哉！汝护正法，能生如是殷重之心。”

尔时，持国天王、乾达婆主从座而起，顶礼佛足，合掌恭敬，白佛言：“世尊！当来之世有诸众生，常行不善，不信如来，于此经典不能供养、书写、读诵，亦不行施，不信布施有现世乐报。世尊大慈！为如是等不信人故，说此经典令彼受行。”

佛言：“善男子，有二种事，令诸众生堕大地狱生死轮回：一者，淫欲；二者，瞋恚。复有四法令诸众生生人、天中。云何为四？一者，于诸众生心行平等；二者，于三宝所起殷重心；三

27

28

者，所有资生皆悉能施；四者，坚持梵行无²⁹令²⁹有缺。”

尔时，世尊欲重宣此义，而说颂言：

布施能有大威神	于三恶趣拔众苦
众生慳贪痴所惑	种种染欲恼其情
闻此经典不敬受	于佛法中无信施
舍身当堕于恶趣	当受无边大剧苦
饶益国主及人民	我说斯经具威德
令离恶病众邪恼	不被药叉等所害
若有信经书写人	供养能生无量福
一切众生智如佛	多劫说福不能尽
若有经于多劫数	供养一切诸菩萨
不如于此妙经王	暂时信心书一字
持前功德比此福	此为亿分不及一
是故智人于此经	一心奉行无懈怠

尔时，观自在菩萨白佛言：“世尊！当来之世，若有善男子、善女人，于此经典深生敬信，以妙³⁰香³⁰华及诸饮食、衣服、卧具，咸悉供养说法之师，及写此经读诵之者，此人现世必当获得无量福利饶益其身，离诸病苦，眼等六根清净无

患，不遭水火饥馑厄难，亦无恶毒之所中伤，一切有情见者欢喜。命终之时，见不动佛来相慰喻³¹，告言：‘善男子，汝修善根，其福无量！’十方净土、极乐世界随意受生。”

尔时，观自在菩萨白佛言：“世尊！善哉！善哉！世尊为欲哀愍瞻部洲中诸众生故，说此经典，当来之世，广作佛事，利益众生。此大明咒能除一切极重业障！”

佛言：“善男子，恶业众生其罪深重，不闻此经，不能书写、受持、读诵。若有众生闻此经典，书写、受持、尊重、供养，当知皆是佛之威神力故。若复有人，于此经典，能为他人说一字者，供养此人与佛无异。何以故？善男子，此经乃是过去七千诸佛之所宣说，一切菩萨悉皆随喜，诸天拥护，是菩萨母。”

尔时，执金刚菩萨白佛言：“世尊！此之经典于未来世，当于何处具足流通？”

佛言：“善男子，此经当于海龙王宫及三十三天皆具足有，瞻部洲中，但有少分随处流通。”

佛言：“善男子，我今以此经典付嘱于汝，应当受持、供养、拥护，与佛无异，在处流通，

勿令断绝，利益众生，广为佛事。”

执金刚菩萨白佛言：“世尊！我今受佛教勅，流布此经，亦复护彼持经法师。”

佛言：“善哉！善哉！善男子，此实是汝所作之事。”

复次，观自在菩萨白佛言：“世尊！我今至诚敬礼如是微妙经典，于说法者及书写人悉皆供养。世尊！若有薄福之国无道君王，设有此经，不能供养及以法师，此经隐没，彼国当有灾难、恶事、祸变现前。如是当知，正法欲灭，智者见已，殷心供养。”

佛言：“善哉！善哉！善男子，如汝所说。假使有人，满足千岁以种种乐具供养诸大菩萨及声闻众，数若恒河沙；复以七宝同此沙数而为布施，后舍自身。善男子，如是之福比于供养持经之福，乃至一句一字，百千万分彼不及一，何况尽能书写读诵！何以故？此经及咒有大威力。若受持者，了身无坚，如幻如梦，知法无我，蒙佛授记，得大菩提。”

尔时，大众一切菩萨及天、龙、药叉、阿苏罗、揭路荼、人、非人等，皆共一心，同声赞佛：“善哉！善哉！此是第二转大法轮，我等悉皆恭

敬供养。此经所在国土城邑，亦当拥护，并说法者。若有众生谤此经者，现身获得无量重罪，命终之后，当堕地狱。我舍是人，不为拥护。”

佛言：“善男子，我今亦以经典付嘱于汝，当来之世，广为宣扬，勿令断灭。此经有大利益，安乐人天，增长福田，离三恶趣，勿生疑惑，常劝受持。”

佛说此经时，六万四千人皆得无生法忍。

观自在菩萨复白佛言：“世尊！若有众生信心书写、受持、读诵、供养此经者，此人命终当生何处？得几所福？”

佛言：“善男子，汝能问此殊胜福事。此人命终，永离恶趣，常³²生净土。假使有人行菩萨行，舍头目手足及以妻子，亦复不如持此经典。此经在处，其地方所则为是塔，皆应供养。”

观自在菩萨复白佛言：“世尊！当来之世，持此经者，我为授记，消灭五逆极重罪障，九万劫中常受富贵，于八万劫作转轮圣王。”

佛言：“如是，如是！善男子，我忆过去无量劫时，有佛世尊，名无边功德法智清净星宿王如来。我于尔时作婆罗门，于彼佛所得闻此经，

受持读诵，得法眼净。其同听者，从是已来，不堕恶趣，渐次当得无上菩提。善男子，我于无量旷大劫中，为此法故，舍诸财宝、头目、手足、妻子、城邑，修净梵行，无悔恼心。汝等亦当如是修习！”

是时，大众闻说过去苦行之事，咸皆泣泪，白佛言：“希有！世尊！当来之世，有能受持、读诵、供养此经典者，得无量福。”

“若有苾刍、苾刍尼、邬波索迦、邬波斯迦等，于此经王不能读诵，陀罗尼咒不肯受持，亦复不能勤修六度，于苦恼者无怜愍心，如是之人，于无量劫堕生死海，受诸苦恼。善男子，譬如妇人身怀重孕，乃至十月，时此妇人，加诸病苦，支节酸疼犹如刀解，不能饮食，欲产之时，受大剧苦，作如是念：‘我若免难，永不淫欲，常修梵行。’才产之后，还行恶法，便忘先时苦切之患。善男子，当来之世，愚痴众生亦复如是，不信此经，亦不读诵、布施、持戒、忍辱、精进、修定、修慧，贪著俗情，乐世间事，不行三业清净之因。此等众生堕于地狱³³，始生悔心，如怀孕妇人身遭极苦；受苦恼已，从地狱出，既得人

身，耽五欲乐，其地狱苦不能记念，还造恶业。

“善男子，譬如有人，多饮药酒，饮已昏迷，不知家处，佛法僧宝、父母妻子，曾不忆念，无恭敬心，由昏醉故，遂往尸林险难之处，亦无怖畏惶惧之心，作如是念：‘岂有天、龙、药叉之类能怖于我？’如是醉人，虽于此时，委卧荆棘，便生乐想，醉醒之后，心³⁴怀追悔，自知非法，言：‘我从今乃至命尽，更不饮酒，作众过失！’后遇恶缘，还复耽饮，同前造过。愚痴有情亦复如是，由贪染故，多畜珍财，作诸憍逸，不念三宝，弃背尊亲，亦不修行施、戒、忍等，不欲希求净佛国土。此等有情，常处生死无涯海中，当堕地狱，长受众苦。设得为人，处胎之时，受众苦恼，被苦逼身，便作是念：‘我若得免此厄难者，更不作罪受斯极苦，恒修善业愿生净土。’彼得人身，由愚痴故，作众罪业，还堕恶道。是故，汝等当善修行，勿为放逸，是我要略之所教诫！”

尔时，具寿阿难陀白佛言：“世尊！此经复有何名？云何受持？”

佛言：“此经凡有五名：一名救一切众生苦

厄，二名菩萨真实所问，三名神通庄严王，四名能成诸佛正觉，五名一切法功德庄严王。”

佛说是经已，诸大菩萨及声闻众，天、龙、药叉、阿苏罗、乾达³⁵婆、人、非人等，皆大欢喜，信受奉行。

佛说一切法功德庄严王经

● 结诵仪

补阙真言

南無喝啰怛那. 哆啰夜耶. 佉啰佉啰. 俱住俱住.
摩啰摩啰. 虎啰. 吽. 贺贺. 苏怛拏. 吽. 泼抹拏. 娑
婆诃.

补阙圆满真言

唵. 呼嚧呼嚧. 社曳穆契. 莎诃.

普回向真言

唵^一娑摩啰^二娑摩啰^三弥摩曩^四萨哈^{呼马切}啰^五摩诃咱^{爻上声}
哈啰吽^六

拔一切业障根本得生净土陀罗尼

南無阿弥多婆夜。哆他伽路夜。哆地夜他。
阿弥唎。都婆毗。阿弥唎哆。悉耽婆毗。阿弥唎
哆。毗迦兰帝。阿弥唎哆。毗迦兰哆。伽弥膩。
伽伽那。枳多迦隶。娑婆诃。

赞佛偈

阿弥陀佛身金色 相好光明无等伦
白毫宛转五须弥 绀目澄清四大海
光中化佛无数亿 化菩萨众亦无边
四十八愿度众生 九品咸令登彼岸

南無西方极乐世界大慈大悲阿弥陀佛

南無阿弥陀佛

阿弥陀佛

南無观世音菩萨

南無大势至菩萨

南無清静大海众菩萨

慈云忏主净土文

一心皈命。极乐世界。阿弥陀佛。愿以净光照我。慈誓摄我。我今正念。称如来名。为菩提道。求生净土。佛昔本誓。若有众生。欲生我国。至心信乐。乃至十念。若不生者。不取正觉。以此念佛因缘。得入如来大誓海中。承佛慈力。众罪消灭。善根增长。若临命终。自知时至。身无病苦。心不贪恋。意不颠倒。如入禅定。佛及圣众。手执金台来迎接我。于一念顷。生极乐国。华开见佛。即闻佛乘。顿开佛慧。广渡众生。满菩提愿。

十方三世一切佛。一切菩萨摩訶萨。摩訶般若波罗蜜。

回向偈

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

三皈依

自皈依佛，当愿众生，体解大道，发无上心。
自皈依法，当愿众生，深入经藏，智慧如海。
自皈依僧，当愿众生，统理大众，一切无碍。和南
圣众。

南无护法韦驮尊天菩萨



ཡི་གེ་ནི་ མུ་ཚ་རྒྱ་གཡེ་འདི་དཔེ་ཆའི་ནང་དུ་བཞག་ནང་དཔེ་ཆ་དེ་ཅི་འདྲར་
བཞག་མཁས་ཀྱང་ནི་ས་པ་མི་འབྱུང་བར་འཇམ་དཔལ་ཚ་རྒྱུད་ལས་གསུངས་སོ།།